

四庫全書

史部

欽定四庫全書

史部
通鑑地理通釋卷二

詳校官修撰臣錢 榮

洗馬臣王坦修覆勘

總校官庶吉士臣何思鈞

校對官中書臣朱 炳

謄錄監生臣伍士鵬

欽定四庫全書

史部二

通鑑地理通釋目錄

編年類

卷一

歷代州域總叙

卷二

歷代州域總叙

卷三

歷代州域總叙

卷四

歷代都邑攷

卷五

十道山川攷

卷六

周形執攷

卷七

名臣議論攷

卷八

七國形執攷

卷九

七國形執攷

卷十

七國形執攷

卷十一

三國形執攷

卷十二

三國形勢攷

卷十三

晉宋齊梁陳形勢攷

河南四鎮攷

卷十四

東西魏周齊相攻地名攷

唐三州七關十一州攷

石晉十六州攷

臣等謹案通鑑地理通釋十四卷宋王應麟撰應麟字伯厚慶元府人淳祐元年進士寶祐中復中博學宏辭科官至禮部尚書兼給事中事蹟具宋史儒林傳所著詩攷詩地理攷困學記聞諸書均已別著於錄是書以通鑑所載地名異同沿革最為糾紛而險要院塞所在其措置得失亦足為有國者成敗之

鑿因各為條列釐訂成編首歷代州域次歷代都邑次十道山川次歷代形勢而終以唐河湟十一州石晉燕雲十六州書本十四卷宋史本傳作十六卷疑傳刻之訛也其中徵引浩博考核明確而叙列朝分據戰攻尤一一得其要領於史學最為有功原書無序後人以書後應麟自跋移冠於前所云上章執徐橘壯之月乃元世祖至元十六年庚辰之

八月是時宋亡已三年蓋用陶潛但書甲子
之義書內稱梓慎為梓謹亦猶為宋諱云乾
隆四十三年六月恭校上

總纂官臣紀昀臣陸錫熊臣孫士毅

總校官臣陸費墀

通鑑地理通釋自序

太極肇分天先成而地後定天依形地附氣地囿于天者也而言地理者難於言天何為其難也日月星辰之度終古而不易郡國山川之名屢變而無窮是故圖以經之書以緯之仰觀俯察其用一也虞書九共先儒以為九丘其篇軼焉傳于今者禹貢職方而止耳若山海經周書王會爾雅之釋地管氏之地員呂覽之有始鴻烈之陸形亦好古愛奇者所不廢然諸儒之傳注異歷

代之區寓殊禹之九河班志僅得其三商之八遷孔疏未聞其四漢水東西之分積石大小之辨荆山之於荆豫梁岐之於冀雍潛在荆者未見蔡在圻內者未詳三江九江五邦三亳則書之說異焉還之為營禰之為坻以著為齊地以韓城為涿郡自土之為自杜倭遲之為郁夷鄒虞之為梁鄒二南之為南郡南陽則詩之說異焉揚紆在冀而爾雅以為秦盧水在濟北而康成讀為雷漳水之為潞吳山之為嶽五湖混於具區潁湛列於

荆浸此職方之疑也豫章在江南而江北之地未知中
牟在河南而河北之地難攷許田魯地而非近許鄆鄭
邑而非鄆陵穀小穀之有別父城城父之不同此春秋
之疑也二地而一名者若王城葵丘酒泉貝丘鍾離之
類一地而二名者若白羽夾谷夷垂葭發陽之類方城
細柳丹水之有三塗山厯山東陽武城之有四瞻彼洛
矣與東都之洛異導洛自熊耳與宜陽之熊耳殊首陽
空桐新城石門石城丹陽白沙硤石之屬其地非一畢

萬之魏為河中之永樂而以元城為大名失矣自廬振
廬為襄陽之中廬而以合肥為廬國失矣潘岳賦西征
不知成師之曲沃在河東韓皋論廣陵散不知魏之揚
州治壽春韓文公南陽人在河內之修武而誤曰鄧州
史記鄖關在漢中之長利而誤曰洵陽杜子美詩三奇
成在彭州之導江而誤改曰三城荀卿蘭陵非常州也
孔明渡瀘非瀘州也公琰屯涪非涪州也公瑾赤壁非
黃也元規南樓非鄂也郢都白雪誤於郢州東海二疎

誤於海州以塗山為會稽以蠶桑為采桑以大別為安
豐以東陵為廬江以楚丘為成武以街亭為南鄭襲訛
踵繆不可殫紀漢沔一也而或二之吳會二也而或一
之江統誤鄴於沛郡皇甫謐誤商丘於濮陽顏師古誤
邛都於邛州青衣於嘉州南陵於宣州注文選不知夷
庚注本草不知沙苑博見疆志者猶或失之舊蹟湮沒
如濟絕于滎碣石淪于海昆明鑿而鎬京為池隋城立
而漢都為苑南北僞置如青有太原豫有廣陵六合之

為秦郡項城之為秣陵玉門之為會稽潯陽在蘄而移
柴桑當塗在濠而寓姑孰郡名非古如雲之雲中平之
北平薊之漁陽縣名非古如京兆之武功豐州之九原
皆非秦漢之舊或若異而同或似是而非不可謂博識
為玩物而不之攷也余閒居觀通鑑將箋釋其地名舉
綱提要首以州域次以都邑推表山川叅以樂毅王朴
之崇論鉉議稽左氏國語史記戰國策通典所叙歷代
形勢以為興替成敗之鑒大易設險守國春秋書下陽

彭城虎牢之義也河湟復而唐衰燕代割而遼熾述其事終焉若昔對白題羊腸帝丘內黃問松亭柳河者以該洽見稱今豈無其人乎孤陋寡聞未免闕誤以俟博雅君子山河不改陵谷屢遷亦以發濫古之一慨云上章執徐歲橘壯之月應麟自序

欽定四庫全書

通鑑地理通釋卷一

宋 王應麟 撰

歷代州域總叙上

神農九州

春秋命歷序云人皇氏分九州神農始立地形甄度四海東西九十萬里南北八十一萬里周禮疏云自神農已上有大九州柱州迎州神州之等至黃帝以來德不及遠惟於神州之內分為九州騶衍云中國名曰赤縣

神州赤縣神州內自有九州禹之序九州是也中國外如赤縣神州者九乃所謂九州也有裨海環之一區中為一州如此者九有大瀛海環其外淮南陸形訓云天地之間九州東南神州曰農土正南次州曰沃土西南戎州曰滔土正西兪州曰并土正中冀州曰中土西北台州曰肥土正北濟州曰成土東北薄州曰隱土正東陽州曰申土帝王世紀云諸子稱神農王天下地東西九十萬里南北八十五萬里愚謂河圖言崑崙者地之

中釋氏言日月照四大洲即駟衍之說此莊子所謂存而不論者也

黃帝九州

禹貢釋文周公職錄云黃帝受命風后受圖割地布九州漢地理志云黃帝旁行天下方制萬里畫壘分州得百里之國萬區晉地理志云黃帝令豎亥步自東極至于西極五億十萬九千八百八步帝王世紀云黃帝推分星次以定律度自斗十一度至婺女七度曰星紀之

次今吳越分野自婺女八度至危十六度曰玄枵之次
今齊分野自危十七度至奎四度曰豕韋之次今衛分
野自奎五度至胃六度曰降婁之次今魯分野自胃七
度至畢十一度曰大梁之次今趙分野自畢十二度至
東井十五度曰實沈之次今晉魏分野自井十六度至
柳八度曰鶉首之次今秦分野自柳九度至張十七度
曰鶉火之次今周分野自張十八度至軫十一度曰鶉
尾之次今楚分野自軫十二度至氐四度曰壽星之次

今韓分野自氐五度至尾九度曰大火之次今宋分野自尾十度至斗十度百三十五分而終曰析木之次今燕分野凡天有十二次日月之所躔也地有十二分王侯之所國也愚謂通典云國之分野上配天象始於周季世紀所云蓋以星官之書自黃帝始也

額帝九州

冀兗青徐揚荆豫梁雍帝王世紀云額帝所建帝嚳受之孔子稱其地北至幽陵南暨交趾西躡流沙東極蟠

木是以建萬國而制九州通典亦謂顓帝置九州葉氏云祭法共工氏之霸九州也其子曰后土能平九州則九州之名舊矣

幽陵幽州交趾交州流沙在沙州西
蟠木東海度素山上有屈盤桃木

舜十二州

冀充青徐揚荆豫梁雍幽并營孔氏云禹治水之後舜分冀為幽并分青為營馬氏云禹平水土置九州舜以冀州之北廣大分置并州燕齊遼遠分燕為幽齊為營漢地理志云堯遭洪水天下分絕為十二州禹平水土

更制九州列五服與孔馬之說異愚謂舜典言肇十有二州咨十有二牧而後命禹平水土當以漢志為正鄭氏謂分衛為并燕以北為幽分齊為營朱氏謂分冀東恒山之地為并又東北醫無閭之地為幽又青之東北遼東等處為營而冀止有河內之地今河東一路是也劉氏云冀州之域大於九州於是分為幽并以此二州北扞夷狄使不得接於王畿書大傳虞夏傳云北十有二州注北域也為營域以祭十二州之分星也

五服

甸侯綏要荒葉氏云禹制五服每服率五百里而王畿甸服在其內則一方為二千五百里東西南北相距各五千里此所謂弼成五服至于五千者也至周而益為九畿每畿亦五百里而王畿又不在內則一方為五千里南北東西各萬里周之地果如是廣乎學者求其說而不得故鄭氏以堯舊服五千里至禹治水之後又增其倍謂禹貢所記為舊服所增之數以與周制合又謂

周公攝政斥大九州之境故五等諸侯之封大者增其五之四小者增其十之五此皆矯妄不經無所取信以周官大司馬九畿之籍考之方千里曰國畿其外亦皆以方言方者謂四方也四方環之為千里徑數之每方當止為二百五十里則周之畿為儉於禹矣林氏云以王制考之堯都冀州自恒山至南河千里自東河至西河千里此畿內千里即甸服也自東河至東海千里自西河至流沙千里此千里建五百里侯服五百里綏服

而東海流沙之外則為要荒誠合經之所載至於南北則有盈縮焉以北考之冀之北距恒山已接於邊陲其間何以容二千五百里之侯綏要荒哉以南考之自南河至江千里已建侯服綏服矣自江至衡山千里則要荒二服又在九州之內矣然自衡山至南海又千里揚州之境且南距海則九州且包乎要荒之外是以南考之則太盈以北考之則太縮實疑而未知其說意其必有乘除相補於其間也應氏云自秦而上西北袤而東

南感自秦而下東南展而西北縮古今之疆理天地之
大運中國夷狄之消長大略可見當先王盛時東西南
北各有不盡之地蓋聽四夷居之不勞中國以事外也
若禹貢之東漸西被而朔南咸暨特其聲教之所及非
必貢賦之所限也故外薄四海弼成五服至于五千者
此區域之大數而疆理之畧者也四海之內斷長補短
方三千里者此民田之大數而疆理之詳者也觀於曰
內曰外二字而治之詳略可知矣王氏曰舜之五服侯

旬綏三服在九州之內要服有夷荒服有蠻在九州之外成周九服侯甸男采衛要六服在九州之內夷鎮藩三服在九州之外

禹九州

冀兗青徐揚荊豫梁雍通典云雍州西境流沙之西荊州南境五嶺之南所置郡縣並非九州封域之內帝王世紀云堯遭洪水分為十二州今虞書是也及禹平水土還為九州今禹貢是也是以其時九州之地凡二千

四百三十萬八千二十四頃定墾者九百一十萬八千二十四頃不墾者千五百萬二千頃民口千三百五十五萬三千九百二十三人至於塗山之會諸侯承唐虞之盛執玉帛亦有萬國是以山海經稱禹使大章步自東極至于西垂二億三萬三千五百里七十一步又使豎亥步南極盡於北垂二億三萬三千五百里七十五步四海之內則東西二萬八千里南北二萬六千里出水者八千里受水者八千里名山五千三百五十經六

萬四千五十六里出銅之山四百六十七出鐵之山三千六百九以供財用蘇氏云堯水河為患最甚江次之淮次之河行冀兗為多而青徐其下流被害亦甚堯都於冀故禹行自冀始次于兗次于青次于徐四州治而河患衰矣雍豫雖近河以下流既治可以少緩也故次于揚次于荆以治江淮江淮治而水患平故次于豫次于梁次于雍以治江河上流之餘患而雍最高故終焉朱氏云冀州極濶河東河北皆屬焉雍州亦濶陝西五

路皆屬焉若青兗徐豫則疆界有不足者矣鄭氏云州縣之設有時而更山川之形千古不易所以禹貢分州必以山川定經界使兗州可移而濟河之兗不能移使梁州可遷而華陽黑水之梁不能遷是故禹貢為萬世不易之書

薛氏云至夏後為禹貢之九州

萬國

鄭氏云州十有二師每一師領百國每州千二百國畿外八州總九千六百國其餘四百國在畿內唐虞土方

萬里九州之內地方七千里劉氏云一州十二師以商周之制推之則連率卒正之類也以五長稽之則五國有長而十長有師乎十長之師凡五十國一州十二師則六百國也州六百國計十二州則七千二百國也十二州之外薄于四海又有五長是以禹會諸侯於塗山執玉帛者萬國也葉氏云所謂萬國者槩其成數未必實有之也

呂氏春秋王者之封建也彌近彌大彌遠彌小海上有十里之諸侯以大使小以重使輕

以衆使寡漢上朱氏曰建萬國者衆建諸侯而少其力

商九有

爾雅九州兩河間曰冀河南曰豫河西曰雍漢南曰荆
江南曰揚濟河間曰兗濟東曰徐燕曰幽齊曰營孫炎
云此蓋殷制孔氏云禹貢有梁青無幽營周禮有幽并
無徐營孫炎以爾雅之文與禹貢不同於周禮又異故
疑為殷制耳亦無明文言殷改夏也地理志云殷因於
夏無所變改陸氏曰禹貢有青徐梁而無并幽營爾雅
有徐幽營而無青梁并職方有青幽并而無徐梁營三

代不同故也陳氏云商書言九有之師商頌言奄有九有式于九圍王制於商亦言九州千七百七十三國則商之九州蓋亦襲夏而已通典云塗山之會萬國四百年間遞相兼并殷湯受命其能存者三千餘國亦為九州冀州在兩河之間西則龍門之河東則濟水大陸之河濟水大陸今冀貝二州界論語三分天下有其二注天下歸文王者六州荆梁雍豫徐揚也惟兗青冀尚屬紂

周九州

揚荆豫青兗雍幽冀并鄭氏注揚荆豫兗雍冀與禹貢

畧同青州則徐州地也幽并則青冀之北也無徐梁晉地理志云成王時改作禹貢徐梁入於青雍冀野析於幽并王氏云九州之序禹貢始於冀次以兗而終於雍職方氏則始於揚次以荆而終於并者蓋禹貢言治水之序也職方言遠近之序也治水則自帝都而始然後順水性所便自下而上故由兗至雍而止也以遠近言之則周之化自北而南為遠故關雎鵲巢之詩分為二南漢廣亦言文王之道被於南國德化之所及以遠為

至也始於揚則以揚在東南次以荆則以荆在正南終於并州以并在正北先遠而後近也左傳王使詹桓伯辭於晉曰我自夏以后稷魏駘芮岐畢吾西土也及武王克商蒲姑商奄吾東土也巴濮楚鄧吾南土也肅慎燕亳吾北土也漢賈捐之曰武丁成王殷周之大仁也然地東不過江黃西不過氐羌南不過蠻荆北不過朔

方鄭氏錡曰周無徐州蓋其地為淮夷徐奄所有李氏曰周却雍不可不廣故合梁雍為一徐地挾隘故青

之燕

九畿 九服 六服 五服

大司馬九畿方千里曰國畿其外侯甸男采衛蠻夷鎮
蕃職方氏九服方千里曰王畿其外侯甸男采衛蠻夷
鎮藩大行人邦畿方千里其外侯甸男采衛要服九州
之外謂之蕃國周官六服羣辟罔不承德六年五服一
朝周語祭公謀父曰先王之制邦內甸服邦外侯服侯
衛賓服蠻夷要服戎翟荒服甸服者祭侯服者祀賓服
者享要服者貢荒服者王日祭月祀時享歲貢終王先

王之訓也葉氏曰禹別九州制天下為五服王畿在其
內周公分天下為九畿而王畿不與以侯甸男采衛之
在中國者為五服言罔不承德則舉六服合王畿言也
言六年一朝則舉五服別諸侯言也鄭氏以殷之大界
方三千里以開方計之方千里者九其一為縣內餘八
各立一州合內外總為千七百七十三國周公復唐虞
之地分五服為九其要服之內方七千里意以夏末既
衰中國之地為四夷所侵至周方能復之今考於禹貢

所謂五服皆五百里為別則是要服之內通於四面距中國之地乃方三千里達於荒服止於五千里康成既以殷之大界方三千里矣固合於禹貢中國之地而謂四夷所侵者果何地也周公雖斥大九州之界而地加於禹貢者纔五百里今職方氏分九州之邦國方千里為王畿自侯甸男至于采衛皆方五百里是五服之地方二千五百里合王畿計之方三千五百里由三千五百里分之合四面相距方七千里迺康成所謂要服之

內也蓋禹貢所謂要荒即周官所謂蠻夷鎮蕃通要荒而合於禹貢中國之地則唐虞夏殷之時中外凡方一萬里通蠻夷鎮蕃而合於周官則周公之時中外凡萬一千里以其一千里之多是以周公斥大封疆纔五百里康成不知異同在此而唯見要服之內方七千里乃牽左氏執玉帛者萬國之說而謂唐虞之時非七千里不能容之且仲虺之誥言表正萬邦纘禹舊服則是湯之時固有萬國矣所謂大界三千里者何以能容之也

然則九州之內千七百七十三國未必殷制王氏曰畿
言其有界畫服言其服王事六年五服一朝者以侯甸
男邦采衛言也六服羣辟罔不承德者兼要服而言之
也先王之制中國五服而周官言六者蓋近中國之夷
狄承德則國家閒暇可以明政刑之時也方是時也四
征弗庭其治未若制禮之際為已備矣故其限朝止於
五服而已周官行人於六服之見則及於要服者則其
治為尤詳於四征弗庭之時也近中國之夷狄非特承

德而又能入貢以來見焉則制禮以致太平者此其極

也鄭氏曰要服蠻服也九州之外夷鎮蕃服也

陳氏曰
衛服之

外聖人雖制之服而不必其來故
武成洛誥康王之誥止言五服

易氏曰禹之五服則

計其一面之數周之九服則計其兩面之數禹之甸服

千里而止言五百里是計其一面者也周之王畿與禹

之甸服同不言五百里而兼言千里是計其兩面之相

距者也蓋禹之五服王畿在內王畿千里而兩面各五

百里數其一面故曰五百里甸服自甸服至荒服皆數

其一而每面各五百里總為二千五百里兩面相距則凡五千里職方氏所載則王畿不在九服之內自方五百里之侯服至於方五百里之蕃服其名凡九九服每面各二百五十里通為二千二百五十里兩面相距則通為四千五百里并王畿千里則通為五千五百里其增於禹者五百里之蕃服耳然周之蕃服雖不列於禹貢九州之外而禹貢九州之外咸建五長東漸西被即成周蕃服之域是周之蕃服其名雖增於禹而其地未

嘗增也周之邦畿即禹貢之甸服周之侯甸即禹貢之
侯服周之男采即禹貢之綏服周之衛蠻即禹貢之要

服周之夷鎮即禹貢之荒服

呂氏曰在商之時古公以皮帶犬馬珠玉事獯鬻而

商王不知在周之時晉國拜戎不暇而周室不與然則三代禦邊之略蓋可知矣

千八百國

洛誥傳云天下諸侯采服來受命於周者千七百七十
三諸侯晉地理志云武王設爵惟五分土惟三封同姓
五十餘國周公康叔建於魯衛各數百里太公封於齊

表東海者也凡一千八百國布列於五千里內而太昊
黃帝之後唐虞侯伯猶存于時治致太平政稱刑措民
口千三百七十一萬四千九百三十三蓋周之盛也其
衰也則禮樂征伐出自諸侯強吞弱而衆暴寡春秋之
初尚有千二百國迄獲麟之末二百四十二年弑君三
十六亡國五十二諸侯奔走不得保其社稷者不可勝
數而見於春秋經傳者百有七十國焉百三十九知其

所居

魯邾鄆宋紀衛西虢莒齊陳杞蔡邢郟晉薛許郕
秦曹楚隨黃梁虞郟小邾徐燕邾康舒庸郟萊吳

越有窮三苗瓜州有虞東號共宿申夷向南燕滕凡戴
息邨芮魏淳于殺巴州琴羅賴牟葛譚蕭遂滑權邾霍
耿江冀強道栢微邨厲項容任須句緇史頤管雍畢豐
邗應蔣茅胙夔介焦沈六巢根牟唐黎邨瑕寒有高斟
灌斟尋遇有過戈偁陽邗鑄豕韋唐杜楊區邨觀鹿邨
胡黎大庭胎岐邨鍾吾蒲姑昆吾房密須甲父邨桐毫

趙韓三十一國盡亡其處

祭極荀賈貳軫絞於餘丘陽其英氏毛聘莘偁封父仍有仍崇

邨庸姚奄商奄棗如蓆有緡閔單颺艘夷窮桑

蠻夷戎狄不在其間五伯迭興

總其盟會陵夷至于戰國遂有七王

韓魏趙燕齊秦楚

又有宋

衛中山不斷如綫今按大庭神農也窮桑少皞也又以

虞夏商諸侯並列

有仍斟尋之類於經傳者一百二十四國

指掌圖發微圖見夷狄不在

其數戰國策顏觸云古大禹之時諸侯萬國及湯之時諸侯三千當今之世南面稱寡者乃二十四帝王世紀云周克商制五等之封凡千七百七十三國戰國存者十餘周之列國唯有燕衛秦楚而已齊及三晉皆以篡亂南面稱王衛雖得存不絕若綫呂氏云天下之戰國七秦變於戎者也楚變於蠻者也燕變於狄者也魏趙韓齊皆大夫竊國者也周禮疏曰畿外八州州別置二百一十國天子縣內九十三國凡九州千七百七十三國

通畿內外是殷周國數也

鄭語史伯曰當成周者南有荆蠻中呂應鄆陳蔡隨唐北

有衛燕翟鮮虞路洛泉徐蒲西有虞虢晉隗霍楊魏芮東有齊魯曹宋滕薛鄆莒

史記諸侯表武王成康所

封數百而同姓五十五地上不過百里下三十里

錢

氏春秋與地攷一百八十有四國夷狄亦與攷其國都則中國之缺者十六

一

星土

鄭司農說星土以春秋傳曰參為晉星商主大火國語曰歲之所在則我有周之分野之屬是也康成謂九州諸國中封域於星亦有分焉其書亡矣堪輿雖有郡國

所入度非古數也今其存可言者十二次之分也星紀
吳越也玄枵齊也姬訾衛也降婁魯也大梁趙也實沈
晉也鶉首秦也鶉火周也鶉尾楚也壽星鄭也大火星
也析木燕也此分野之妖祥主用客星彗孛之氣為象
孔氏曰星紀在於東北吳越實在東南魯衛東方諸侯
遙屬戌亥之次又三家分晉方始有趙而韓魏無分趙
獨有之漢書地理志分郡國以配諸次其地分或多或
少鶉首極多鶉火甚狹徒以相傳為說其源不可得聞

於其分野或有妖祥而為占者多得其效蓋古之聖哲
有以度知非後人所能測也陳氏曰九州十二域或繫
之北斗或繫之二十八宿或繫之五星雍主魁冀主樞
青兗主機揚徐主權荆主衡梁主開陽豫主搖光此繫
之北斗者也星紀吳越玄枵齊姬訾衛降婁魯大梁趙
實沈晉鶉首秦鶉火周鶉尾楚壽星鄭大火宋析木燕
此繫之二十八宿者也歲星主齊吳熒惑主楚越鎮星
主王子太白主大臣辰星主燕趙代此繫之五星者也

然吳越南而星紀在丑齊東而玄枵在子魯東而降婁
在戌東西南北相反而相屬何耶先儒以謂古者受封
之月歲星所在之辰其國屬焉觀春秋傳凡言占相之
術以歲之所在為福歲之所衝為災故師曠梓慎裨竈
之徒以天道在西北而晉不害歲在越而吳不利歲淫
玄枵而宋鄭饑歲弃星紀而周楚惡歲在豕韋而蔡禍
歲及大梁而楚凶則古之言星次者未嘗不視歲之所
在也梓慎曰龍宋鄭之星也宋大辰之虛也陳大皞之

虛也鄭祝融之虛也皆火房也衛高陽之虛也其星為大水以陳為火則大睥之木為火母故也以衛為水則高陽水行故也子產曰遷閼伯於商丘主辰商人是因故辰為商星遷實沈于大夏主參唐人是因故參為晉星然則十二域之所主亦若此也易氏曰在諸侯則謂之分星在九州則謂之星土九州星土之書亡矣今其可言者十二國之分考之傳記我祥所應亦有可證而不誣者昭十年有星出於婺女鄭裨竈曰今茲歲在顛

項之墟姜氏任氏實守其地釋者以顓頊之墟為玄枵
此玄枵為齊之分星而青州之星土也昭三十二年吳
伐越晉史墨曰越得歲而吳伐之必受其凶釋者以為
歲在星紀此星紀為越之分星而揚州之星土也昭元
年鄭子產曰成王滅唐而封大叔焉故參為晉星實沈
為參神此實沈為晉之分星而并州之星土也襄九年
晉士弱曰陶唐氏之火正閼伯居商丘相土因之故商
主大火此大火為宋之分星而豫州之星土也昭十七

年星孛及漢申須曰漢水祥也衛顛頊之墟故為帝丘
其星為大水此娠訾為衛之分星而冀州之星土也襄
二十八年春無冰梓慎曰歲在星紀而淫于玄枵蛇乘
龍龍宋鄭之星此壽星為鄭之分星而亦豫州之星土
也鄭語周史曰楚重黎之後也黎為高辛氏火正此鶉
尾為楚之分星而荊州之星土也爾雅曰析木謂之津
釋者謂天漢之津梁為燕此析木為燕之分星而幽州
之星土也以至周之鶉火秦之鶉首趙之大梁魯之降

婁無非以其州之星土而為其國之分星所占哉祥其
應不差然亦有可疑者武王伐殷歲在鶉火伶州鳩曰
歲之所在我有周之分野蓋指鶉火為西周豐岐之地
今乃以當洛陽之東周何也周平王以豐岐之地賜秦
襄公而其分星乃謂之鶉首又何也如燕在北而配以
東方之析木魯在東而配以西方降婁秦居西北而鶉
首次於東南吳越居東南而星紀次於東北此皆稽之
分野有不合者賈氏以為古者受封之月歲星所在之

辰恐不其然若謂受封之辰則春秋戰國之諸侯以之
占妖祥可也後世占分野而妖祥亦應豈皆古者受封
之辰乎此堪輿之書雖足攷古而言郡國所入之度則
非古之法理道要訣云周季上配天象有十三國呂氏
云十二次蓋戰國言星者以當時所有之國分配之唐
氏云子產言封實沈于大夏主參封閼伯于商丘主辰
則辰為商丘分參為大夏分其來已久非因封國始有
分野若以封國歲星所在即為分星則每封國自有分

星不應相土因關伯晉人因實沈矣又漢魏諸儒辰次
度各用當時歷數與歲差遷徙亦非天象度數之正惟
唐一行下觀山河兩戒上考雲漢之終始斗杓之內外
以定分星之次更以七宿之中分四象中位自上元之
首以度數紀之而著其分野最得天象之正

四極 四荒

爾雅東至於泰遠西至於邠國

說文作汭國汭西南極之水也府中切

南至

於濮鈞北至於祝栗謂之四極此四方極遠之國觚竹

北戶西王母日下謂之四荒觚竹者漢地理志遼西令

支有孤竹城

齊語北伐山戎制令支斬孤竹括地志孤竹殷諸侯古城在平州盧龍縣南十二里

史記正義孤竹君是殷湯正月三日丙寅封相傳至夷齊之父北戶者即日南郡顏師古曰

在日之南所謂開北戶以向日者秦始皇紀南至北嚮戶與地廣記景州北景縣漢屬日南後為林邑所據晉

九真太守灌窻討林邑於其國五月五日立八尺表日景在表南九寸一分故自北景以南皆開北戶以嚮日

唐於驩州南境僞立景州非正北景也淮南陸形訓南方曰都廣曰及戶西王母者山海西

荒經西海之中流沙之濱有崑崙之丘有人戴勝虎齒

名曰西王母

穆天子傳天子宥于西王母乃紀其跡于弇山名曰西王母之山

日下者

日所出處其下之國

淮南天文訓日出於暘谷浴于咸池拂于扶桑是謂晨明通典東夷

有扶桑在中國之東其土多扶桑木倭一名日本自云國在日邊山海東荒經大荒之中有山曰大言日月所出有大人之國有山曰合虛日月所出有中容之國呂氏春秋禹東至搏木之地日出九津青羌之野

呂

氏春秋凡四海之內東西二萬八千里南北二萬六千

里水道八千里受水者亦八千里通谷六名川六百陸

注三千小水萬數凡四極之內東西五億有九萬七千

里南北亦五億有九萬七千里極星與天俱遊而天樞

不移冬至日行遠道周行四極命曰玄明夏至日行近

道乃參于上當樞之下無晝夜白民之南建木之下日
中無影呼而無響蓋天地之中也尸子云八極之內有
君長者東西二萬八千里南北二萬六千里故曰天左

舒而起牽牛地右濶而起畢昴

淮南墜形訓八極東北
方曰方土之山曰蒼門

東方曰東極之山曰開明之門東南方曰皮母之山曰
陽門南方曰南極之山曰暑門西南方曰編駒之山曰
白門西方曰西極之山曰闔闔之門西北方曰不
周之山曰幽都之門北方曰北極之山曰寒門張衡

靈憲云八極之維徑二億三萬二千三百里南北則短
減千里東西則廣增千里自地至天半於八極則地之

深亦如之朱文公謂爾雅四極恐未必然邠國近在秦隴非絕遠之地也靈憲所言八極之廣原於歷算若有庸
据依然非專言地之廣狹也呂氏春秋九塞大汾冥阮荆阮方城穀井陘令疵句注居

秦四十郡

晉地理志云始皇初并天下懲恣戰國削罷列侯分天

下為三十六郡內史

漢三輔及弘農郡

三川

漢河內河南兩郡

河東南

陽南郡九江

漢並因之

鄆郡

治故鄆在今湖州長興縣西南

它郡所治當

考漢改為丹陽郡

會稽潁川

漢並因之

碭郡

漢梁國

泗水

漢改為沛郡

薛郡

漢魯國

東郡

琅邪

漢並因之

齊郡

漢齊國

上谷

漁陽

右北平

遼西

遼東

代郡

鉅鹿耶郾上黨太原雲中

漢並因之

九原

漢改為五原郡

鴈門

上郡

隴西北地漢中巴郡蜀郡

漢並因之

黔中

漢改為武陵郡今鼎澧辰沅黔州之

地長沙

漢長沙國

凡三十六郡於是興師踰江平取百越置

桂林

漢改為鬱林郡

南海

治番禺漢因之

象郡

漢改為日南郡

閩中

徐廣曰治侯官漢武

帝虛其地

合四十郡一守焉其地則西臨洮而北沙漠東

紫西帶皆臨大海秦紀云地東至海暨朝鮮西至臨洮

羌中南至北嚮戶北據河為塞並陰山至遼東周書作

雒篇千里百縣縣有四郡

說文周制天子地方千里分為百縣縣有四郡

呂氏

曰春秋之時郡屬於縣趙簡子誓衆所謂上大夫受縣

下大夫受郡是也戰國之時縣屬於郡秦紀惠文十年

魏納上郡十五縣是也方孝公商鞅時并小鄉為大縣

縣一令尚未有郡牧守稱及魏納上郡之後十餘年秦

紀始書置漢中郡或者山東諸侯先變古制而秦效之

歟按戰國策楚王以新城為主郡以此攷之郡之所治

必居形勢控扼之地郡者縣之主故謂之主郡又云三川河東在諸郡之首者蓋所以陪輔關中地勢莫重焉即漢所謂三河也漢分三川為河南河內與河東號為三河史記貨殖傳曰昔唐人都河東殷人都河內周人都河南夫三河在天下之中若鼎足王者所更居也建國各數百千歲胡氏曰郡縣天下可以持承平不可以支變故封建諸侯可以持承平可以支變故孫氏曰郡縣之制盡剝根著之舊以為空虛之天下匹夫亡秦五

胡覆晉盜賊篡唐此非有秦人取天下之威而失之反

掌

漢高祖紀有東陽郡吳郡郟郡淮嬰傳有豫章郡皆非秦郡蓋楚漢之際所置

通鑑地理通釋卷一

欽定四庫全書

通鑑地理通釋卷二

宋 王應麟 撰

歷代州域總叙中

漢九國

史記漢興以來諸侯年表太史公曰漢興序二等

章昭曰漢

封功臣大者王小者侯也高祖末年非劉氏而王者若無功上所不

置而侯者天下共誅之高祖子弟同姓為王者九國

徐廣

曰齊楚荆淮南燕趙梁代淮陽索隱曰徐氏九國不數吳蓋以荆絕乃封吳故也仍以淮陽為九今按下文所

列有十國者以長沙異姓故言九國唯獨長沙異姓而功臣侯者百餘人

自鴈門太原以東至遼陽

顏氏云遼水之陽地
理志遼東遼陽縣

為燕代

國常山以南太行左轉度河濟阿甄

阿今鄆州東阿縣
正義云甄即濮州

鄆城縣
北音縮

以東薄海為齊趙國自陳以西

地理志淮
陽國陳縣

南至

九疑

括地志九疑山在永州唐興縣東
南一百里地理志在營道縣南

東帶江淮穀泗

晉灼曰水經云泗水在魯卞縣
璿曰穀在彭城泗之下流為穀水

薄會稽為梁楚吳淮

南長沙國皆外接於胡越而內地北距山以東盡諸侯

地大者或五六郡連城數十置百官宮觀僭於天子

漢書

諸侯王表云自鴈門以東盡遼陽為燕代恒山以南太行左轉度河濟漸于海為齊趙穀泗以往奄有龜蒙為梁楚東帶江湖溥會稽為荆吳北界淮瀕畧廬衡為淮南波漢之陽巨九疑為長沙諸侯比境周匝三垂外接胡越顏氏曰比謂相接次也三垂謂北東南也

漢獨有三河東郡潁川南陽自

江陵以西至蜀北自雲中至隴西與內史凡十五郡而

公主列侯頗食邑其中何者天下初定骨肉同姓少故

廣彊庶孽以鎮撫四海用承衛天子也漢定百年之間

親屬益疎諸侯或驕奢怵邪臣計謀為淫亂大者叛逆

小者不軌于法以危其命殞身亡國天子觀於上古然

後加惠使諸侯得推恩分子弟國邑故齊分為七

徐廣曰城

陽濟北濟南菑川膠西膠東是分為七

趙分為六

徐廣曰河間廣川中山常山清河

梁分

為五

徐廣曰濟陽濟川濟東山陽也

淮南分三

徐廣曰廬江衡山

及天子支庶

子為王王子支庶為諸侯百有餘焉吳楚時前後諸侯

或以適削地是以燕代無北邊郡吳淮南長沙無南邊

郡

如淳曰長沙之南更置郡燕代以北更置緣邊郡其所有統利兵馬器械三國皆失之矣

齊趙梁

楚支郡名山陂海咸納於漢諸侯稍微大國不過十餘

城小侯不過數十里上足以奉貢職下足以供養祭祀

以蕃輔京師而漢郡八九十形錯諸侯間犬牙相臨東

其阨塞地利強本幹弱枝葉之勢也楚都彭城徐州彭城縣

齊都臨菑青州臨淄縣荆都吳平江府吳縣高十二年更為吳國郡

志輿地廣記吳王濞都廣陵今揚州江都縣按地理志廣陵縣江都王非廣陵王胥皆都此不言濞也淮

南都壽春安豐軍壽春縣燕都薊幽州薊縣趙都邯鄲磁州邯鄲縣梁都

睢陽應天府宋城縣淮陽都陳陳州宛丘縣代都中都汾州平遙縣西南十二里

高紀云都晉陽太原府太原縣如淳曰似遷都於中都呂氏曰史記書分趙山北

立子恒以為代王子長少游四方識輿地之大勢故其

書法簡明得主名山川之餘意如此類非一漢書多改

之蓋班氏所未達也

如漢二年書置隴西北地上郡渭南河上中地郡關外置河南郡六

年書封韓信為淮陰侯分其地為二國將軍劉賈數有功以為荆王王淮東弟交為楚王王淮西則函谷之內

外淮水之東秦漢之間稱山北山南山東山西者皆指

太行太行在漢屬河內郡堊王山陽之間在今屬懷州

在天下之中故指此山以表地勢焉

胡氏曰高帝懲秦孤立大封同姓然

割地無制建侯無法封三庶孽分天下牛苟簡一時流患於後

郡國更置

地理志漢興以秦郡太大稍復開置又立諸侯王國武帝開廣三邊故自高祖增二十六文景各六武帝二十八昭帝一訖於孝平凡郡國一百三縣邑千三百二十四道三十二侯國二百四十一地東西九千三百二里南北萬三千三百六十八里晉志漢分內史為三部更置郡國二十有三桂陽江夏豫章河內魏郡東海楚國平原梁國定襄泰山汝南淮陽千乘東萊燕國清河信都常山中山渤海廣漢涿郡合二十三內史者河上

渭南中地武帝改以為京兆馮翊扶風是為三輔文增
厥九廣平城陽淄川濟南膠東河間廬江衡山武帝改
衡山曰六安景加其四濟北濟陰山陽北海宣帝改濟
北曰東平武帝開越攘胡初置十七南海蒼梧鬱林合
浦交阯九真日南珠崖儋耳九郡平西南夷置牂柯越
雋沈黎汶山犍為益州六郡西置武都郡又分立零陵
郡合十七郡拓土分疆又增十四弘農臨淮西河朔方
酒泉陳留安定天水玄菟樂浪廣陵敦煌武威張掖昭

帝少事又增其一金城至平帝元始二年凡新置郡國七十有一與秦四十合一百一十有一今按晉志云郡國一百一十一而漢志止一百三以秦郡攷之南海因舊名桂林更名鬱林象郡更名日南閩中元封元年虛其地則四十郡省者一因改者三漢初未定兩粵止有三十六郡通典謂新置六十三與秦四十合百三亦未攷此也以武帝初置郡攷之天漢四年并沈黎于蜀始元五年罷儋耳臨屯真番地節三年并汶山于蜀初元三

年罷珠厓凡省六郡而臨屯真番元封三年開朝鮮所
置者晉志不載則并省者四除八郡正合漢志一百三
之數林氏云漢山川不出禹貢分域而里數倍加者古
今尺步不同吳氏云南北萬三千餘里舉朔方日南而
言按史記平準書漢連兵三歲誅羌滅南越番禺以西
至蜀南者置初郡十七即晉志所謂初置者南海至儋
耳九郡皆南越地武都至汶山五郡皆西南夷地夜郎
為犍為滇為益州

今化外
姚州

并零陵為十七郡酒泉武威

張掖敦煌本匈奴昆邪休屠地是為河西四郡並金城
謂之河西五郡又定朝鮮為四郡樂浪玄菟在遼東之
東通典云今為東夷之地臨屯治東旄真番治雪見于
茂陵書又擊匈奴取河南地築朔方亦初郡也元朔置
蒼海三年而罷元始置西海中興而廢故志不著隴西
天水安定北地上郡西河是為六郡名將多出焉北地
朔方五原雲中定襄鴈門代郡西河是為緣邊八郡除
北地西河而益右北平上谷漁陽是為緣邊九郡存其

國號而屬漢者曰屬國置都尉安定上郡天水五原張掖是為五屬國其後金城西河北地亦置焉按武帝初

置無象郡

茂陵書云治臨虛

昭紀元鳳五年罷象郡分屬鬱林

牂柯而史不書建置之始蓋闕文也賈捐之建議棄珠厓曰制南海以為八郡是時儋耳已并屬珠厓矣三方之開皆自好事之臣西南夷發於唐蒙司馬相如兩粵起嚴助朱買臣朝鮮由涉何昔者堯禹之德訖于四海而地不盡四海故地不足而德有餘若漢則廣地而已

秦地南不過閩粵北不過太原漢又廣於秦矣凡中國
為內郡宣元成紀所謂內郡國也緣邊有夷狄障塞者
為外郡又按馬援說揚廣曰前披輿
地圖見天下郡國百有六所當攷
揚雄曰大漢左東

海右渠搜前番禺後陶塗東南一尉西北一候

注會稽東部都

尉敬煌玉門關候

十三部

百官表元封五年初置部刺史掌奉詔條察州秩六百

石員十三人

漢十三部關中三河司隸自察之刺史所以有十三員者征和以前司隸所統亦有

刺史察之也

前後漢地理志武帝開地斥境南置交趾

顏氏曰胡

廣記云漢既定南越之地置交趾北置朔方之州胡廣

刺史別於諸州令持節治蒼梧漢分雍州置朔方刺史雍州即漢涼州也以廣之言攷之則涼州疆界濶遠分朔方諸郡別置刺史察之是涼

州有兩刺史也兼徐梁幽并夏周之制夏有徐梁而無幽并周有幽并而無徐梁漢兼

其制則為改雍曰涼改梁曰益凡十三部為十一州新

置交州并司隸所領為十三部司隸校尉部按前漢志司隸校尉武帝征和四年初置察三輔三

河弘農則今年初置十三部尚未有司隸校尉京兆扶風馮翊弘農河內河南

河東七郡昭帝始元元年有司隸河內屬豫州刺史部

潁川汝南沛郡梁魯國凡三郡二國冀州刺史部魏鉅

鹿常山清河郡趙平干

宣帝改曰廣平

真定中山信都河間國

凡四郡六國兗州刺史部陳留山陽濟陰泰山東郡城

陽淮陽東平國凡五郡三國徐州刺史部琅邪東海臨

淮郡泗水廣陵楚國凡三郡三國青州刺史部平原千

乘濟南北海東萊齊郡菑川膠東高密國凡六郡三國

荊州刺史部南陽江夏桂陽武陵零陵南郡長沙國凡

六郡一國揚州刺史部廬江九江會稽丹陽豫章郡六

安國凡五郡一國益州刺史部漢中廣漢武都犍為越

駕益州梓柯蜀郡凡八郡涼州刺史部隴西金城

昭帝置

天水武威張掖酒泉敦煌安定北地凡九郡并州刺史

部太原上黨西河朔方五原雲中定襄鴈門上郡凡九

郡幽州刺史部渤海上海陽右北平遼西遼東玄菟

樂浪涿代郡廣陽國凡十郡一國交州刺史部南海鬱

林蒼梧交趾合浦九真日南七郡後漢與前者司隸

治河南朔方屬并州

建武十一年省朔方

交趾曰交州

建安二年改

顏

氏云武帝初置朔方郡

今夏州朔方縣北

別令刺史監之不在

十三州之限通典云十三部不常所治後漢司隸治河

南

今河

南府豫治譙

今亳州

兗治昌邑

今濟州

徐治郟

今淮

陽軍

今淮

陽軍

今淮

陽軍

下邳

青治臨淄

今青州

涼治隴

今秦州

并治晉陽

今太原

府太原

今太原

府太原

今太原

府太原

榆次

冀治部

今趙州

幽治薊

今幽州

揚治歷陽

今和州

州和州

今和州

州和州

今和州

州和州

治漢壽

今常德

益治雒

今漢州

交治廣信

今梧州

刺史

今梧州

刺史

今梧州

刺史

今梧州

刺史

更名牧者凡四改

綏和元年

建武元年

中平五年

光武都洛陽

關

中復置雍州後罷興平元年分涼州河西四郡為雍州

是為十四州建安十八年并十四州復為九州獻帝紀

所謂復禹貢九州者省幽并以為冀省司隸涼以為雍

省交州以入荆益於是有兗豫青徐荆揚冀益雍

禹貢無益

有梁其地一也

是時曹操自立為魏公欲廣冀州而益其地非

復古也

荀彧傳云操領冀州牧或說操宜復古置九州則冀州所制者廣大

後漢郡國

郡國志世祖中興惟官多役煩乃命并合省郡國十縣

邑道侯國四百餘所

紀云建武六年詔省減吏員并合郡縣於是并省四百餘縣

至

明帝置郡一章帝置郡國二和帝置三安帝又命屬國

別領比郡者六廣漢蜀郡犍為張掖居延遼東又所省

縣漸復分置至於孝順凡郡國百五縣邑道侯國千一

百八十

永興初有鄉三千六百八十二亭萬二千四百二十

郡國比前志增二縣

邑道侯國比前志少三百九十七晉志光武在彫耗之

辰郡國蕭條并省者八城陽淄川高密膠東六安真定

泗水廣陽

按光武紀建武十三年并省西京國廣陽當作廣平

今按郡國志云省

郡國十此云并省者八蓋後復河間廣陽明帝置一永

昌章帝置二任城吳郡和順改作其名有九和置濟北

廣陽順改淮陽為陳改楚為彭城濟東為東平臨淮為

下邳千乘為樂安信都為安平天水為漢陽郡國百有

八焉

省前漢八分置五改
舊名七因舊九十六

桓靈頗增於前復置六郡桓

高陽高涼博陵靈南安鄱陵廬陵今按靈又置一汶山

以汶江蠶陵
廣柔三縣置

獻分置二永寧

分巴
郡置

西海通典東樂浪西

燉煌南日南北鴈門西南永昌四履之盛亦如前漢

按今

興平元年孫策分立廬陵建安十五年孫權分立鄱陽
乃獻帝時十道志云靈帝末揚州刺史劉遵上書分立

郡二文中子見牧守屢易曰堯舜三載考績仲尼三年有

成今旬月而易吾不知其道三代之興邦家有社稷焉
兩漢之盛牧守有子孫焉不如是之亟也無定主而責
之以忠無定民而責之以化雖曰能之末由也已迂齋
樓氏曰聖王不作建國封侯之法一壞於秦而不可復
破萬國而為郡縣罷五等而立守宰內樂其下之易制
而吏不得以私其民國無定民民無固志不知夫無定
民於下是無定民於國也無固志於上是無固志於君
也謫戍倡亂天下瓦解郡殺其守縣劫其令三十六郡

鞠為盜淵南陽之齟三川之由泗川之壯或降或死平時無尺寸之柄文法吏議不少貸宜其拱手無策也雖然郡縣初置守宰猶能有所為也武職甲卒屬於都尉虎符調發召而復來歲及立秋都肄講武則兵權不盡屬於公上也鹽鐵筦榷之利未興放散官錢捐以予民則利權不盡歸於公上也直指未遣使司隸未置員刺史未臨察則事權不盡聽於公上也兵皆郡守之兵則選練易以精財皆郡守之財則斂散易以專事皆郡守

之事則施置易以便不滿歲不為真不數年不一易彼
自承尉以上貶退稱進出於其手民習於教條不敢有
慢易之心氣勢聯屬運掉不難有尊重難危之勢而無
朝暮不保之憂視其郡如視其家待其民如待其子弟
是以守馮翊者得以奏令而換縣守渤海者得以單車
而平賊守南陽者得以誅宛令之輕已盜賊竊發應時
捕討誅其渠帥支黨解散則無潰決之虞羣偷縱橫披
藉輒在把其宿負痛斷窟穴則無陰伏之患惟不有以

奪其權故吏得以行其志惟吏得以私其民故亦得以不負於其國中興以來併武職於太守罷都試於郡國守相之權非曩日比矣然桂陽任衛颺者十年山陽任秦彭者六年循吏之效表表為中興第一雲中守以兵敗而功曹與之俱斃漁陽守以戰沒而主簿自投以赴雖安順以後分守陵夷而吏民愛戴猶不少減范文正公曰周漢李唐雖有禍亂而能中興者人未厭德作亂者不能革天下之心是邦本之固也六朝五代之亂鮮

克中興者人厭其德弔民者有以革天下之心是邦本之不固也屏山劉氏曰賦斂急則守令才賦斂寬則守令賢守令賢則民寬守令才則民擾由上使之也并能移漢之社稷而不能移漢之民心

漢郡國鹽鐵官

通鑑武帝元狩四年冬置鹽鐵官昭帝始元六年春詔問賢良文學民所疾苦皆對願罷鹽鐵官於是鹽鐵之議起焉元帝初元五年六月罷鹽鐵官永光三年冬以

用度不足復鹽鐵官

鹽鐵論文學曰文帝時無鹽鐵之利而民富今有之

而百姓困丞相請且罷關內鐵官今攷官自煮鹽自

齊燕始

管子有渠辰之鹽伐菹析麥水為鹽又曰燕有遼東之煮

其後齊祈望守

之左傳鐵有官自秦始

管子計人用鐵稅之而已官未嘗冶鑄太史公自序司馬昌為

秦王至漢鹽鐵之利二十倍於古大司農有幹官鐵

市兩長丞有郡國鹽官鐵官

續志注出鹽多者置鹽官主鹽稅出鐵多者置

鐵官主後漢皆屬郡縣建初中章帝議復鹽鐵官大

司農鄭衆諫以為不可詔數切責衆執之不移帝不從和帝詔曰先帝遺戒郡國罷鹽鐵之禁縱民煮鑄入稅縣官如故事

鹽官

地理志河東郡安邑縣 太原郡 又晉陽縣 南

郡丞縣 鉅鹿郡堂陽縣 渤海郡章武縣 千乘

郡 北海郡都昌縣 又壽光縣 東萊郡曲成縣

又東牟縣 又恆縣 又昌陽縣 又當利縣

琅邪郡海曲縣 又計斤縣 又長廣縣 會稽郡

海鹽縣 蜀郡臨邛縣 犍為郡南安縣 巴郡朐

忍縣 隴西郡 安定郡三水縣 北地郡弋居縣

上郡獨樂縣 又龜茲縣 西河郡富昌縣 朔

方郡沃瑩縣 五原郡成宜縣 鴈門郡樓煩縣

漁陽郡泉州縣 遼西郡海陽縣 王尊補遼西鹽官長 遼東郡

平郭縣 南海郡番禺縣 蒼梧郡高要縣 總三

十有六 又鴈門郡沃陽縣鹽澤在東北有長丞

漢鹽官在東南者不多有會稽纔一廣陵無之遺利

猶在民也唐天下有鹽之縣一百五江南十二淮南

二郡縣志楚州鹽城縣本漢鹽漬縣州長百六十里在海中洲上有鹽亭百二十三所每歲煮鹽四十

五萬石揚州海陵縣鹽監歲煮鹽六十萬石而楚州鹽城浙西嘉興臨平兩監所出次焉計每歲天下鹽利當租賦三分之一今以紹興末年攷之兩浙有場四十二淮

東有場二十視古益密矣

鐵官

地理志京兆鄭縣 馮翊夏陽縣 扶風雍縣 又

漆縣 弘農郡宜陽縣 河東郡安邑縣 又皮氏

縣 又平陽縣 又絳縣 太原郡大陵縣 河內

郡隆慮縣 河南郡 潁川郡陽城縣 汝南郡西

平縣 南陽郡宛縣 廬江郡皖縣 山陽郡 沛

郡沛縣 魏郡武安縣 常山郡都鄉縣 涿郡後漢

承元十五年復置 涿郡故安鐵官 千乘郡 又千乘縣 濟南郡

東平陵縣 又厯城縣 泰山郡嬴縣 齊郡臨淄

縣 東萊郡東牟縣 琅邪郡 東海郡下邳縣

又朐縣 臨淮郡鹽漬縣 又堂邑縣 桂陽郡

續志

未陽有鐵官建武中太守衛颯上起鐵官

漢中郡沔陽縣 蜀郡臨邛

縣 犍為郡武陽縣 又南安縣 隴西郡 漁陽

郡漁陽縣 右北平郡夕陽縣 遼東郡平郭縣

中山國北平縣 膠東國郁秩縣 城陽國莒縣

東平國 魯國魯縣 楚國彭城縣 廣陵國 總

四十有九

管子曰出鐵之山三千六百九漢關內有鐵官蓋始

元罷之而復置張湯傳趙國以冶鑄為業王數訟鐵

官事

志所載趙國無鐵官

征和二年涿郡鐵飛河平二年沛郡

冶鐵飛則舊異動焉陽朔三年潁川鐵官徒盜庫兵

永始三年山陽鐵官徒盜庫兵則姦宄生焉唐天下

有鐵之縣一百三宋鐵冶七十七皆多於漢蘇文忠

公謂徐州東北七十餘里即利國監自古為鐵官凡

三十六冶冶戶皆大家常為盜賊所窺

即漢彭城鐵官也

紹

興末鐵坑興者三百七十七乾道中鐵歲收二百十

六萬二千一百四十四斤 鹽鐵使始於唐乾元元年第五琦

輿地圖

漢有司空郡國輿地圖

周禮大司徒職方氏注

武帝案以封三子

光武披以定天下明章以等諸侯之租陳氏曰戰國策士每言闕周室則按圖籍以爭天下蕭何入秦獨收圖籍自漢守之司空寢以泄布如江都淮南諸王皆按輿地謀變而王鳳亦云太史公書有地形阨塞不宜在諸

侯王然則古圖志雖司徒掌之而藏在司馬祕不得見
先王所以弭姦消患者其慮遠哉王氏曰先王建國所
以周知九州封域與其人民之數者詔地事則有圖詔
觀事則有志比生齒則有籍指掌圖序曰昔蘇秦按此
以說諸侯而知六國有十倍之執蕭何藏此以相高祖
而知天下阨塞之所在聚米為象馬援以度隗囂建樓
以畫德裕以服南詔藩鎮強梁於河北而險要詳於吉
甫先零跋扈於隴西而地形上於充國規制華夷靡不

憑此元和郡縣圖志序曰秦皇并六國罷侯置守漢武
討百蠻窮兵黷武雖裂為郡縣遠過殷周而教令所行
威懷所服亦不越於三代

三國州郡

通典云魏據中原有州十二司隸荆

通典無
荆州

豫兗青徐

涼秦

治上邽
今秦州

冀幽并揚雍有郡國六十八蜀全制巴蜀

置益

治成
都

梁 治漢中
今興元

二州有郡二十二吳北據江南盡

海置交

治龍編
今安南

廣

治番禺
今廣州

荆

治南郡
今江陵

郢

治江夏
今鄂州

揚

治建業
今

建康五州有郡四十三晉志魏武置十二

新興樂平西平新平畧陽陰平

帶方譙樂陵章武南鄉襄陽

所省七

上郡朔方五原中定襄漁陽廬江

文帝置七

朝歌

陽平弋陽魏興新城義陽安豐

明及少帝增二

明帝上庸少帝平陽

得漢郡者五

十四焉蜀先主置郡九

巴東巴西梓潼江陽汶山漢嘉朱提宕渠涪陵

後主增

二

雲南興古

得漢郡者十有一焉吳大帝置郡五

臨賀武昌珠厓新都

廬陵南都

少帝景帝各四

少臨川臨海衡陽湘東景天門建安建平合浦北部

歸命侯

置十二

始安始興邵陵安成新昌武平九德吳興東陽桂林滎陽宜都

得漢郡者十有

八焉魏以司隸之三河弘農冀之平陽為司州分雍州

河西為涼州隴右為秦州分遼東昌黎玄菟帶方樂浪

為平州後合為幽州揚荆二州魏吳並立魏揚治壽春

荆治襄陽吳分南海蒼梧鬱林為廣州交趾日南九真

合浦為交州

呂岱傳表分海南三郡為交州海東四郡為廣州

蜀以建寧太守

遙領交州

建寧漢益州永昌今姚州

魏明帝詔郡縣條為劇中平

宋志

吳得揚荆交三州蜀得益州魏氏猶得九焉

晉十九州

地理志晉武帝太康元年平孫氏增置郡國二十三

陽上洛頓丘臨淮東莞襄城汝陰長廣廣寧昌黎新野

隨郡陰平義陽毘陵宣城南康晉安寧浦始平略陽樂

平南平省司隸置司州別立梁秦寧平四州仍吳之廣

州凡十九州司治洛陽兗治廩丘

今濮州豫治項今陳州

城冀治房子

今趙州臨城縣

并治晉陽青治臨淄徐治彭城今徐州

州荆初治襄陽後治江陵揚初治壽春後治建業涼治

武威

今涼州

雍治京兆秦治上邽

今秦州

益治成都梁治南

鄭元

今興元府

寧治雲南

今姚州

幽治涿

今幽州范陽縣

平治昌黎

漢遼西交

黎唐安東府

交治龍編

唐安南府

廣治番禺

今廣州

惠帝分揚之豫

章至晉安七郡荆之桂陽武昌安成三郡立江州

宋州郡志

云太康元年天下統一統凡十六州後又分涼雍為秦分荆揚為江分益為寧分幽為平而為二十矣郡國

一百七十三

仍吳所置二十五仍漢舊九十三置二十一仍魏所置二十一仍漢舊九十三置二十三

永

嘉南度境宇殊狹九州之地有其二焉

晉以魏公族微弱委兵諸王遞

相攻伐致亂尤速八王汝南王亮楚王瑋趙王倫齊王冏長沙王乂成都王穎河間王顒東海王越

宋二十二州

通典云自東晉成帝時中原流民多南渡遂於江漢淮

之間僑立州郡以撫其民中間併有廢置離合非一不能詳制焉今大較以孝武大明八年為正凡二十二州

揚治建業南徐治京口

今鎮江丹徒縣

徐治彭城南兗治廣陵

兗治瑕

今襲慶府瑕丘縣

南豫治歷陽豫治汝南

今蔡州汝陽縣

江治

尋陽

今江州

青治臨淄

初治歷城今濟南府縣後治廣固今青州益都縣後移治

冀治

歷城司治義陽

今信陽軍

荆治南郡

今江陵府

郢治江夏湘治臨

湘今潭州

雍治襄陽梁治南鄭秦亦治南鄭益治成都寧

治建寧

今姚州

廣治南海

今廣州

交治龍編越治臨鄣

今蘇州

郡凡二百三十八縣千一百七十九宋志江左又分荆
為湘或離或合凡有揚荆湘江梁益交廣其徐州則有
過半豫州唯得譙城而已宋分揚為南徐徐為南兗揚
州之江西悉屬豫州分荆為雍分荆湘為郢分荆為司
分廣為越分青為冀分梁為南北秦太宗初青冀徐兗
及豫州淮西不守於鍾離今濠州縣置徐州淮陰今楚州縣為北
兗而青冀治贛榆今海州東海縣江左大鎮莫過荆揚故謂荆
州為陝西二州戶口居江南之半揚州為根本委荊州

以聞外李忠定曰六朝能保守江左以強兵巨鎮盡在

淮南荆襄間

杜佑曰宋孝武政更舊制國吏不得稱臣自茲以還建侯日削

齊二十三州

通典齊青治朐山

今海州縣

冀治漣口

今泗州漣水縣

豫治壽春北

兗治淮陰北徐治鍾離又置巴治巴東

今夔州

其餘因宋

代州二十有三郡三百九十五縣千四百七十四南齊

志三峽險隘山蠻寇賊宋立三巴校尉以鎮之後省建

元二年分荊州巴東建平益州巴郡為州立刺史

梁陳州郡

隋地理志梁天監十年有州二十三郡三百五十縣千
二十二其後開閩越克淮浦平俚洞破牂柯又以舊州
析置大同中州百有七陳氏土宇彌蹙西亡蜀漢北失
淮肥以長江為境有州四十二地轉狹而州益多郡百
有九縣四百三十八司馬公曰陳國不能居天下五分
之一文中子叔恬曰敢問元經書陳亡而具五國何也
子曰江東中國之舊也衣冠禮樂之所就也永嘉之後

江東貴焉而卒不貴無人也齊梁陳於是乎不與其為國也及其亡也君子猶懷之書五國並時而亡蓋傷先王之道盡墜故君子大其言極其敗於是乎掃地而求更新也

後魏州郡

地形志州百十有一郡五百十九縣千三百五十二劉氏曰拓跋氏乘後燕之衰蠶食并冀三十餘年而中國畧定遷洛之後稍用夏禮母后亂於內羣盜撓其外禍

始於六鎮釁成於爾朱國分為二而亡矣

通典六鎮在朔州雲州單

于府界正始中更立三戍正光五年改鎮為州郡縣志沃野故城在天德軍城北六十里即後魏六鎮從西第

一鎮也自北出石門障即光祿城城東北有懷朔古城後朔州即後魏六鎮從西第二鎮也武川城今名里城後

魏六鎮從西第三鎮在軍北二百里北史太和十八年八月幸懷朔武川撫冥柔玄等四鎮薄骨律鎮靈州

温池縣懷荒禦夷鎮蔚州河南四鎮碣磣滑臺洛陽虎牢明帝以沃野懷朔薄骨律武川撫冥柔玄懷荒

禦夷諸鎮並改為州

北齊後周州郡

隋志通典自東西魏之後天下三分梁陳有江東高氏

據河北有州九十七郡百六十縣三百六十五

後周書
周平齊

得州五十郡一百六
十二縣三百八十

宇文有闕西南清江漢西兼巴蜀

及平齊有州二百一十一郡五百八縣千一百二十四晉
宋之後至周割據分裂州部乃倍兩漢

隋州郡

隋志通典開皇三年以官繁民弊廢五百餘郡以州治
民職同郡守無復刺舉之任九年減陳天下始合為一
析置州縣煬帝平林邑置蕩農沖三州既而併省諸州

改州為郡依漢制置太守以司隸刺史相統治定吐谷

渾置鄯善且末西海河源四郡凡郡一百九十縣一千

二百五十五東西九千三百里南北一萬四千八百十

五里東南皆至海西至且末

沙州以東唐地里志渡且末河五百里至播仙鎮故

且末

北至五原

豐州

何氏曰天下久分裂而難合也而秦

隋合之然皆止於二世自古亡國無連於此天下之業

既定而猶虛用其衆也

以不仁得之以不仁守之必及其世秦隋是也

通鑑地理通釋卷二